

8.28.10

*Idem AA. Rufino.*

Et qui sub imagine alterius personae, quam supposuerat, iugiter tenet, cum sibi negotium gerat, alienasse non videtur. Iure enim pignoris obligatum praedium neque si per subiectam personam creditor comparaverit neque si sibi addixerit, debitori adfert praeiudicium, sed in eadem permanet, in qua fuit ante huiusmodi collusionem.

1 ¶ Sane si debitore distrahente, comparaverit, consensu emptionem perfectam, si neque dolus adversarii, neque metus causa gesta arguerentur, revocari exemplo gravi est.

2 ¶ Si igitur poteris evidentibus probationibus monstrare, creditorem per suppositam imaginarii emptoris personam semper possessionem tenuisse nec vendita bona fide praedia postea sinceriter comparasse, potes oblata pecunia cum usuris ad restitutionem creditorem compellere.

*PP. III non. Oct. ipsis IIII et III AA. cons.*

[a. 290]

8.28.11

*Idem AA. et CC. Rufinae.*

Mulier licet res specialiter pignori dederit pro alio, creditor eas distrahendi non habet facultatem, nisi dissimulatione, marito obligante velut proprias, creditoris ignorantiam circumscripserit.

*PP. V k. Mai. Heraclide AA. cons.*

[a. 293]

8.28.12

*Idem AA. et CC. Zotico.*

Si debitor rem tibi iure pignoris obligatam te non consentiente distraxit, dominium cum sua causa transtulit ad emptorem.

*S. prid. k. Mai. Heracliae AA. cons.*

[a. 293]

8.28.13

*Idem AA. et CC. Theodotae.*

Qui praedium obligatum a creditore comparavit, si in vacuum possessionem inductus non est, nullam in rem actionem habet.

[a. 293]

8.28.14

*Idem AA. et CC. Modesto.*

Si in hoc quod iure debetur tibi satisfactum non fuit, et debitoribus res obligatas tenentibus aditus praeses provinciae tibi distrahendi iubebit fieri facultatem.

*PP. XVI k. Dec. Sirmi AA. cons.*

[a. 293]